



Republika e Kosovës
Republika Kosova-Republic of Kosovo



Oda e infermierëve, mamive dhe profesionistëve tjerë shëndetësor të Kosovës
Komora medicinskih sestara, babica i ostalih zdravstvenih stručnjaka Kosova
The Kosovo Chamber of nurses, midwives and other health professionals

RREGULLORE PËR LICENCIMIN DHE RILICENCIMIN E LOGOPEDEVE

Prishtinë, 2025

KUVENDI I ODËS SË INFIERMIEREVE, MAMIVE DHE PROFESIONISTËVE TJERË SHËNDETËSOR TË KOSOVËS (OIK-së) në mbështetje të Nenit 19, paragrafi 1 me nën-paragrafin 1.1 në lidhje me nenin 9, paragrafi 1 me nën paragrafin 1.3 të Ligjit 04/L-150 për Odat e Profesionistëve Shëndetësor, Nenit 19, paragrafi 1 me nën paragrafin 1.1 në lidhje me nenin 14, paragrafi 1 me nën-paragrafin 1.3 të Statutit të Odës së infermierëve, mamive dhe profesionistëve tjerë shëndetësorë Kosovës, nenit 2 paragrafi 4 të rregullores për licencimin dhe rilicencimin e profesionistëve të OIK nr. 246 të datës 28/02/2025, në mbledhjen e mbajtur me_____, nxjerr këtë:

R R E G U L L O R E P Ë R LICENCIMIN DHE RILICENCIMIN E LOGOPEDËVE

KAPITULLI I – DISPOZITAT E PËRGJITHSHME

Neni 1

Qëllimi

Me këtë rregullore përcaktohet mënyra dhe kriteret e licencimit dhe rilicencimit të logopedëve me licensë të përkohshme- Logoped (ose bashkëpunëtor i logopedit) dhe të logopedëve, kushtet e menaxhimit të regjistrave përkatës në të cilët mbahet evidenca e të gjithë të logopedëve me licensë të përkohshme- Logoped (bashkëpunëtor i logopedit) dhe të logopedëve të OIK që posedojnë licensë, përfshirë edhe ata të cilët rilicencohen, me qëllim të ruajtjes së standardeve të profesionit të logopedisë në Kosovë.

Neni 2

Fushëveprimi

1. Kjo rregullore zbatohet për procedurat e licencimit dhe rilicencimit të logopedëve me licensë të përkohshme- Logoped (bashkëpunëtor i logopedit) dhe të logopedëve.
2. Përcakton përmbajtjen dhe fushëveprimin e komisionit për Licencimin dhe Rilicencimin e Logopedëve.
3. Kjo rregullore përfshinë dispozita edhe për çështje të tjera që ndërlidhen me procesin e licencimit dhe rilicencimit të logopedëve me licensë të përkohshme- Logoped (bashkëpunëtor i logopedit) dhe të logopedëve.
4. Procedura e licencimit dhe rilicencimit të logopedëve me shtetësi jo kosovare rregullohet me akte të veçanta.

Neni 3

Përkufizimet

- o Termet dhe akronimet të përdorura në këtë rregullore kanë këtë kuptim:
- o **Licencimi** – procedura për dhënien e lejes profesionistit shëndetësor që të merret me veprimtari shëndetësore në Kosovë dhe që është i autorizuar ta ushtrojë veprimtarinë shëndetësore në pajtim me ligjin e zbatueshëm në Kosovë;
- o **Anëtarë** - nënkupton logopedin e anëtarësuar në OIK;

- o **Faksimili** – nënkupton vulën unike të cilën i licencuari e përdorë me rastin e lëshimit të dokumenteve dhe raporteve në bashkëngjitje të nënshkrimit personal të logopedëve;
- o **Regjistri** – Regjistrat e Licencave, Regjistrat e Ri licencave si dhe Regjistrin e revokimit të licencave dhe ri licenca Oda – nënkupton Odën e Infermierëve, Mamive dhe Profesionistëve tjerë Shëndetësorë të Kosovës;
- o Komisionet - Nënkupton Komisionin përkatës për licencim dhe ri licencim të logopedëve;
- o **EVP** – nënkupton Edukimin e Vazhdueshëm Profesional; dhe
- o **MSh** – nënkupton Ministrinë e Shëndetësisë.
- o **Licencë e punës – Logoped** - Profesionisti shëndetësor i licencuar nga Oda i cili ka të drejtë të ushtrojë profesionin i pavarur;
- o **Licence e përkohshme – Logoped - Bashkëpunëtor** - i cili nuk mund të ushtroj punën në mënyrë të pavarur.
- o Termat dhe fjalitë që nuk janë të përfshira në përkufizimet sipas kuptimeve të dhëna në paragrafin 1 të këtij neni, do të interpretohen sipas kuptimeve të përgjithshme gjuhësore dhe njohurive të përgjithshme shkencore dhe teknike.

Neni 4

Përbërja, përgjegjësitë dhe funksionimi i Komisionit

1. Komisioni për licencim dhe ri licencim të logopedëve, është komision i OIK i cili formohet nga Organet e OIK-ut dhe përbëhet nga 5 anëtarë. Anëtarët e komisionit duhet të kenë së paku përgatitjen e njëjtë profesionale dhe licencën e punës me kandidatin që është në procedurë të licencimit – ri licencimit.
2. Komisioni ka këto kompetenca dhe përgjegjësi:
 - a. Vendosjen në shkallë të parë mbi përmbushjen e kushteve për licencimin dhe ri licencimin e profesionistëve të Odës nga fusha e logopedisë;
 - b. Valorizimin e pikëve kredituese në rilicencim;
 - c. Bashkëpunimin me organet e tjera të Odës me qëllim të përmbushjes së funksioneve të përgjithshme të Odës;
 - d. Kryejnë detyrat të tjera sipas akteve normative të miratuara nga organi kompetent i Odës.
3. Shërbimi profesional i Odës ndihmon, mbështet dhe përkrahë Komisionin në realizimin e përgjegjësiave të përmendura.
4. Puna dhe procedurat e vendimmarrjes të komisioneve për Licencim dhe Rilicencim janë të rregulluara me Rregulloren e punës të organeve të Odës.
5. Për çdo mëdyshje rreth procedurës së valorizimit, Komisionet mund të kërkojnë opinionin në KEVP-së dhe Këshillit Drejtues.
6. Mënyra e vlerësimit të pikëve kredituese lidhur me EVP-në, janë nën përgjegjësinë e Komisioneve për Rilicencim të OIK, dhe çështjet përkitazi me këtë procedurë si dhe kriteret e valorizimit rregullohen me rregulloren për EVP dhe me këtë rregullore.

KAPITULLI II LICENCIMI / RILICENCIMI I LOGOPEDËVE

Neni 6

Licenca e Logoped - Bashkëpunëtor

Licenca e përkohshme e punës është dokument publik që dëshmon kompetencën profesionale të logopedëve për kryerjen e veprimtarisë shëndetësore në Republikën e Kosovës të mbikëqyrur nga logoped të licencuar në Republikën e Kosovës.

Neni 7

Licenca e punës

Licenca e punës është dokument publik që dëshmon kompetencën profesionale të logopedëve për kryerjen e pavarur të veprimtarisë shëndetësore në Republikën e Kosovës.

Neni 8

Detyrimi për licencim/rilicencim

1. Licencimi respektivisht rilicencimi është i detyrueshëm për të gjithë logopedët për ushtrimin e veprimtarisë shëndetësore nga profili përkatës sipas autorizimeve ligjore.
2. Licencimi / Rilicencimi është procedurë e veçantë administrative që ka karakter zyrtar dhe publik.
3. Regjistri i licencave mirëmbahet nga shërbimi profesional i Odës, dhe përmbajnë së paku të dhënat si:
Emrin dhe Mbiemrin e anëtarit;
Llojin e licencës;
Numrin e Licencës;
Profilin shëndetësor të anëtarit;
Datën e lëshimit të Licencës;
Datën e skadimit të Licencës;
4. Regjistri i revokimit të Licencave mirëmbahet nga shërbimi profesional i Odës, dhe përmbajnë së paku këto të dhëna:
Emrin dhe Mbiemrin;
Numrin e Licencës;
Arsyen për të cilën revokohet licenca;

KAPITULLI III – PROCEDURA E LICENCIMIT ME LICENCË – LOGOPED - BASHKËPUNËTORË, LOGOPED DHE RI LICENCIM

Neni 9

Kushtet për licencim të Logopedëve me licencë të përkohshme- Logoped, me licencë me veprim të pavarur (apo emri “LICENCË E PUNËS - LOGOPED”) & ri licencim të Logopedëve.

- Të jetë shtetas i Republikës së Kosovës;

- Ekstrakti i lindjes;
 - Të jetë i regjistruar dhe i anëtarësuar në Odë;
 - Për rilicencim të ketë certifikatat e ndjekjes së EVP-së;
 - Të posedoj dokumentin për deklaratën nën hetime;
2. Anëtarët e OIK për t'u licencuar me licencë me veprim të pavarur (apo "LICENCË E PUNËS- LOGOPED") apo për t'u ri licencuar duhet të plotësojë këto kushte:
 - Të dorëzojë licencën paraprake kopje;
 - Ti ketë përmbushur obligimet ndaj OIK;
 - Të ketë realizuar pagesën për rilicencim.
 3. Kriteri i cili duhet të plotësohet për të aplikuar për rilicencim është 20 pikë nga edukimii vazhdueshëm profesional për çdo vit kalendarik nga momenti i licencimit.
 4. Programet valide të cilat mund të llogariten për edukim të vazhdueshëm duhet të jenë brenda fushës së logopedëve.
 5. Në rastet kur nuk plotësohen të paktën 20 pikë për vit kalendarik nga momenti i licencimit nga edukimi i vazhdueshëm, në mënyrë anologe zbatohen dispozitat e rregullores për procedurat e Licencimit dhe Ri licencimit për anëtarët e OIK.
 6. Anëtari i Odës i cili ka arritur moshën 65 vjeçare, në momentin e aplikimit duhet të sjell certifikatën mjekësore për punë se është i aftë për ushtrimin e profesionit.
 - Kohëzgjatja e licencës së punës nga paragrafi paraprak është 2 vite.
 - Kriteret e EVP-së përcaktohen përshtatshëm me kohëzgjatjen e licencës nga paragrafi paraprak.
 - Taksa administrative për lëshimin e licencës nga paragrafi paraprak, paguhet në përpjesëtim me kohëzgjatjen e licencës së punës.

Neni 10

Inicimi i procedurës për licencim me licencë të përkohshme - Logoped

1. Procedura për licencim iniciohet nga anëtari i Odës ose personi i autorizuari tij me parashtrimin e aplikacionit për licencim.
2. Kandidati për licencim, për nivel të licencës Logoped-Bashkëpunëtorë duhet të ketë ë përfunduar nivelin adekuat bachelor të studimeve, stazhin themelor pos diplomik dhe të ketë dhënë provimin profesional.
3. Kandidati për licencim për nivelin e licencës Logoped duhet të ketë të përfunduar nivelin e studimeve master të profilit adekuat me 300 ECTS, duhet përfunduar provimi profesional të licencës.
4. Anëtari i Odës i cili ka licencë pune të Logopedit me nivel master të studimeve 60 ECTS apo ka përfunduar studimet e rregullta të barazvlerësuar me 240 ECTS dhe ka 2 vite përvojë pune të dëshmuar me kontratë pune dhe vërtetim nga trusti pensional i Kosovës pas licencimit fiton të drejtën për Licencë si Logoped.
5. Kandidatët të cilët më parë kanë përfunduar stazhin themelorë dhe kanë licencë pune së paku një vit nuk obligohen të përfundojnë përsëri stazhin.

Neni 11

Barazvlerësimi i thirrjeve profesionale

1. Logopedët e licencuar me nivel të studimeve Bachelor dhe të cilët kanë mbi 3 vite përvojë pune të pavarur në institucionet e licencuara nga MSH kanë të drejtë të aplikojnë për provim profesional të licencës të barasvlershme me thirrjen e licencës së Logopedit të pavarur.
2. Përmbajtjen dhe kohëzgjatjen për mbajtjen e provimit profesional nga paragrafi 1 i këtij neni do të përcaktoj komisioni i veçantë i ekspertëve i emëruar nga OIK.
3. Kandidatët të cilët nuk i plotësojnë kriteret për paraqitjen e provimit nga paragrafi 3 dhe 4 i nenit 10 dhe nuk arrijnë thirrjet profesionale pas skadimit të afatit 3 vite nga hyrja në fuqi e kësaj rregulloreje, licenca aktuale do të shndërrohet në Logoped-Bashkëpunëtorë.
4. Nga momenti i hyrjes në fuqi të kësaj rregulloreje, kandidatët me nivel bachelor të studimeve fitojnë thirrjen Logoped-Bashkëpunëtorë. Të njëjtit pas periudhës 4 vjeçare dhe pas ushtrimit të profesionit nën mbikëqyrjen e Logopedit të pavarur të dëshmuar me rekomandim, kanë të drejtën të aplikojnë për provim profesional pranë komisionit të ekspertëve të formuar nga OIK.

Neni 12

Inicimi i procedurës për ri licencim të logopedëve me licencë të përkohshme-Logoped apo me licencë me veprim të pavarur (apo “LICENCË E PUNËS-LOGOPED”)

1. Anëtarët e odës apo personi i autorizuar nga ai, mund të iniciojë procedurën për rilicencim 90 (nëntëdhjetë) ditë para skadimit të afatit të licencës aktuale të punës dhe jo më vonë se 30 (tridhjetë) ditë para skadimit të licencimit.
2. Rregullat ndëshkuese për kandidatët të cilët nuk respektojnë afatet e përcaktuara nga paragrafi 1 i këtij neni zbatohen në mënyrë analoge nga Rregullorja për Licencim dhe Ri licencimin e Profesionistëve Shëndetësorë.
3. Anëtarët të cilët nuk kanë respektuar afatin e paraparë në paragrafin 1, nuk mund të ushtrojnë veprimtarinë e tyre deri në nxjerrjen e vendimin për përmbushjen e kriterëve sipas aplikimit për rilicencim.
4. Shërbimi profesional i Odës me rastin e pranimin të aplikacionit, parashtruesit i lëshon një vërtetim/konfirmim me të cilin dëshmohet dorëzimi i aplikacionit për licencim, respektivisht për rilicencim.
5. Anëtari duhet të dëshmoj përmes certifikatave të paktën 20 pikë kredituese për çdo vit kalendarik nga momenti i marrjes së licencës, të cilat i përkasin fushës së logopedisë.
6. Logopedët e pavarur për çdo kandidat Logoped-Bashkëpunëtorë të mentoruar përfitojnë 10 pikë kredituese në mënyrë analoge për rregulloren për EVP.

Neni 13

Rilicencimi i anëtarëve të cilët nuk përmbushin kriteret e EVP për rilicencim

1. Logopedët dhe Logoped-Bashkëpunëtorë të cilët nuk kanë plotësuar kriteret e parapara për EVP, respektivisht nuk kanë grumbulluar pikët e nevojshme përmes aktiviteteve të EVP-së, obligohet t'i nënshtrohet Provimit për rilicencim, për vlerësimin e njohurive/shkathtësive për

lëminë e caktuar.

2. Kandidati për provim të rilicencimit duhet të dorëzojë kërkesën dhe taksën administrative.
3. Provimi për rilicencim organizohet nga Komisionet për vlerësimin e njohurive/shkathtësive (KVNJ).
4. KVNJ formohet nga Këshilli Drejtues i OIK. Shërbimi profesional i odës është përgjegjës për mbarëvajtjen e procedurës dhe organizimit e provimit për rilicencim.
5. Logopedët dhe Logoped-Bashkëpunëtorë të cilit kanë licencë të skaduar për periudhën nga 6 muaj deri në 5 vite, i nënshtrohen provimit për rilicencim nga komisioni për provim.
6. Logopedi dhe Logoped-Bashkëpunëtorë i cili ka licencë të skaduar për periudhën prej 5 vite deri në 10 vite, obligohet të kryejë stazhin praktikë nga profili përkatës në kohëzgjatje deri në 3 muaj.
7. Logopedi dhe Logoped-Bashkëpunëtorë i cili ka licencë të skaduar për periudhën prej më shumë se 10 vite, obligohet të kryejë stazhin praktikë nga profili përkatës në kohëzgjatje deri në 6 muaj.
8. Programi i stazhit hartohet nga komisioni profesional i emëruar nga Këshilli Drejtues dhe miratohet nga KD.
9. Pas përfundimit të stazhit nga pika 8, kandidati i nënshtrohet verifikimit të aftësive dhe shkathtësive praktike të fituara gjatë stazhit profesional.
10. Vlerësimi i dijes do të bëhet përmes testimit teorik dhe praktik. Pjesa teorike e verifikimit bëhet përmes testeve, dhe hartohet nga KVNJ. Vlerësimi i suksesit: është: "kaluar" ose "nuk ka kaluar".
11. Kandidati që ka kaluar me sukses provimin vlerësues, i lëshohet një certifikatë nga KVNJ për përfundimin e suksesshëm të provimit, me çka përmbyllet procesi i rilicencimit dhe anëtari pajiset me licencë.
12. Nëse kandidati nuk e kalon provimin e rilicencimit është i detyruar t'i nënshtrohet provimit të dytë brenda tre (3) muajve nga data e provimit të parë.
13. Nëse edhe pas herës së tretë (3 muaj pas mbajtjes së herës së dytë të provimit) kandidati nuk e kalon vlerësimin përfundimtar ose nuk arrin atë, atëherë anëtari i nënshtrohet sërish stazhit profesional në periudhë prej 1 viti.
14. Taksa administrative për organizimin e provimit për rilicencim rregullohet me vendim të veçantë të miratuar nga Këshilli Drejtues i OIK.

KAPITULLI IV - KRITERET PËR PROCESIN E EDUKIMIT TË LOGOPEDËVE

Neni 14 Edukimi formal

1. Studimet bazike në fushën e logopedisë.
2. Studimet e magjistraturës(master) në fushën e logopedisë,
3. Studimet e doktoratës në fushën e logopedisë.

KAPTULLI V – VENDIMARRJA E KOMISIONIT

Neni 15 Vendimmarrja dhe lëshimi i licencës/rilicencës së punës

1. Komisionet për Licencim / Rilicencim të logopedëve do të shqyrtojnë dokumentacionin së bashku me aplikacionin për licencim dhe do të nxjerrë vendim për lëndën përkatëse në afat prej 45 (dyzetepesë) ditëve nga dita e dorëzimit të dokumenteve.
2. Me rastin e nxjerrjes së vendimit mbi licencim apo rilicencim, Komisioni mund që:
 - 2.1. Të aprovojë kërkesën për licencim apo rilicencim të aplikuesit me të cilën lëshon Licencën si rekomandim për Kryetarin e OIK për nënshkrimin e saj;
 - 2.2. Të refuzojë licencimin apo rilicencimin e aplikuesit për shkak të mosplotësimit të kushteve sipas kësaj rregulloreje.
3. Komisioni për licencim mund që gjatë shqyrtimit të kërkojë nga parashtruesi të bëjë plotësimin e dokumentacionit që kërkohet për licencim apo rilicencim, duke i dhënë afat parashtruesit që plotësimin e tillë ta bëjë në afat prej 15 (pesëmbëdhjetë) ditëve nga dita e njoftimit, nëse parashtruesi nuk i përgjigjet afatit për plotësimin e dokumentacionit konsiderohet që nuk ka aplikuar fare.
4. Në procedurën e licencimit, zbatohet përshtatshmërisht rregullat e Ligjit për Procedurën e Përgjithshme Administrative.
5. Palët e pakënaqur ndaj vendimeve të Komisioneve për Licencim apo Rilicencim sipas paragrafit 2 të këtij neni, mund të parashtrojë ankesë pranë Këshillit Drejtues të Odës në afat prej 15 (pesëmbëdhjetë) ditëve nga data e pranimit të vendimit.
6. Në bazë të procesverbalit/vendimit të Komisionit për licencim të konstatuar në procesverbal, Kryetari i Odës nënshkruan licencën e punës e cila i dorëzohet personalisht parashtruesit.
7. Me rastin e dorëzimit të licencës, dorëzimi i tillë do të evidentohet në regjistrin e pranimit-dorëzimit të licencave.
8. OIK lirohet nga përgjegjësia e ruajtjes së licencave të cilat nuk tërhiqen nga anëtari brenda periudhës 6 mujore nga dita e njoftimit për gatishmërinë e saj për tërheqje. Në rast humbje pas këtij afati, anëtarit mund të kërkojë vetëm dublikatin e licencës.

Neni 16 Afatshmëria e licencës së punës

1. Licenca e punës për anëtarët e OIK, lëshohet me afat prej 5 (pesë) viteve e nënshkruar nga

Kryetari i Odës sipas rekomandimit të Komisionit në procesverbal.

2. Në rast të humbjes së statusit të anëtarit të Odës, anëtarit i pushon validiteti i Licencës së punës.
3. Organi përkatës i Odës mund të informojë organet përkatëse në MSH, Inspektoratin Shëndetësor dhe punëdhënësin për skadimin e vlefshmërisë së Licencës së punës të anëtarit

Neni 17

Përgjegjësia e përdorimit të licencës së punës

1. Licenca e punës i lëshohet anëtarit, në vetëm 1 (një) ekzemplar origjinal, ndërsa një kopje mbetet në dosjen e tij.
2. Licenca e punës në asnjë mënyrë nuk mund të përdoret nga ndonjë person tjetër në mënyrë që të arsyetojë ushtrimin e veprimtarisë të logopedëve.
3. E drejta për të ushtruar veprimtarinë në bazë të Licencës së lëshuar të punës, nuk mund të bartet e as të autorizohet te personi tjetër.
4. I licencuari është përgjegjës për ruajtjen dhe përdorimin e Licencës së punës sipas dispozitave të kësaj Rregulloreje.
5. Në rast të humbjes së licencës apo të dëmtimit të saj i licencuari duhet ta publikojë në njërën nga gazetatat ditore vendore apo ta paraqesë në polici. Fotokopjen e këtij publikimi duhet t'ia bashkëngjisë shkresës njoftuese për Odën.
6. Tërheqja e licencës bëhet nga anëtari personalisht, apo personit të autorizuar nga ana e palës.

Neni 18

Përmbajtja e dokumenti të licencës së punës

1. Autorizimi për punë të pavarur (licenca e punës) është dokument letre në format A4 dhe ka këtë përmbajtje:
Në këndin e sipërm majtas të dokumentit gjendet stema e Republikës së Kosovës, ndërsa në këndin e sipërm djathtas gjendet e logo e Odës,
Në pjesën e sipërme të dokumentit shënohet baza juridike e lëshimit të licencës së punës;
Në mes të dokumentit është emri i dokumentit "Licencë e përkohshme e punës" apo "Licencë me veprim të pavarur (apo "LICENCË E PUNËS- LOGOPED") të punës". Nën tekstin e përmendur janë të dhënat për emrin dhe mbiemrin, titullin profesional, data dhe vendi lindjes, numri personal/letërnjoftimit të mbajtësit të dokumentit dhe qëllimin e lëshimit të dokumentit, me tekstin: "Për të ushtruar profesionin në mënyrë të pavarur në tërë territorin e Kosovës, meqë i plotëson kushtet e parapara me Ligj,";
Në pjesën e poshtme të dokumentit janë të dhënat e mbajtësit të dokumentit varësisht nga statusi profesional: numri i diplomës së studimeve apo certifikatës së provimit, numri identifikues i licencës (kodi), data e lëshimit dhe data e skadimit të licencës së punës;
Në këndin e poshtëm majtas figuron QR CODI, ndërsa në këndin e poshtëm djathtas figuron nënshkrimi i kryetarit të OIK;
2. Dokumenti i licencës së punës shkruhet në gjuhën shqipe, serbe dhe angleze.

Neni 19

Kopja e dublikuar e Licencës së punës

1. Me kërkesë të anëtarit të Odës, shërbimi profesional i OIK mund të lëshojnë Licencë pune

të dublifikuat, në rast se origjinali është humbur apo dëmtuar rënd, pas shpalljes së pavlefshme në ndonjëerën gazetë ditore apo në polici, në të cilën do të shënohet se është dublikatë i Licencës së punës origjinale.

2. Shërbimi profesional i OIK do të lëshojë licencën e punës dublikatë në afat të përputhshëm me afatin e Licencës së punës origjinale.
3. Parashtruesi i kërkesës për lëshimin e Licencës së punës dublikatë, është i obliguar që të paguajë taksën administrative për këtë shërbim në përputhje me tarifat administrative në fuqi.

Neni 20

Aplikimi me vonesë për licencim/rilicencim

1. Nëse anëtari i Odës nuk i nënshtrohet procesimit të licencimi brenda afatit prej 5 vit nga dhënia e provimit shtetërorë për licencim, i nënshtrohet vlerësimit të aftësive/shkathtësive profesionale nga Komisioni përkatës i odës dhe/ose mbajtjes së stazhit profesional.
2. Nëse anëtari i Odës nuk i nënshtrohet procesimit të licencimi brenda afatit prej 5 vite nga përfundimi i stazhit profesional, i nënshtrohet vlerësimit të aftësive/shkathtësive profesionale nga Komisioni përkatës i odës dhe/ose mbajtjes së stazhit profesional.
3. Nëse anëtari i Odës nuk i nënshtrohet procesimit të rilicencimi brenda afatit prej 6 muaj nga skadimi i licencës, i nënshtrohet vlerësimit të aftësive/shkathtësive profesionale nga Komisioni përkatës i odës dhe/ose mbajtjes së stazhit profesional.
4. Procedura e provimit, stazhit dhe vlerësimit të aftësive/shkathtësive profesionale rregullohet përshtatshmërisht me anëtarët të cilët nuk kanë plotësuar kriteret për EVP.

KAPITULLI VI – FAKSIMILI SI SHENJË E IDENTIFIKIMIT PERSONAL DHE PROFESIONAL

Neni 21

Mënyra e lëshimit dhe përdorimit të faksimilit

1. Logopedët e licencuar me licencë të pavarur të punës, pajisen me faksimil, i cili shërben si shenjë e identifikimit personal dhe profesional.
2. Anëtari i Odës nga profilet si në paragrafin e 1 të këtij neni, krahas kërkesës për faksimil duhet të dorëzoj: kopjen e licencës së punës.
3. Faksimili përdoret gjatë ofrimit të drejtpërdrejtë të kujdesit shëndetësor, për vërtetimin e dokumentacionit mjekësor.
4. Një person tjetër nuk mund ta përdorë faksimilin në emër dhe për llogari të bartësit të faksimilit.

Neni 22

Përmbajtja e faksimilit

1. Faksimili ka këtë përmbajtje:
 - Logo e Odës;
 - Emrin dhe mbiemrin e të licencuarit;

- Thirrjen profesionale për të cilën është licencuar;
 - Kodin e licencës së punës.
2. Madhësia dhe lloji i shkronjave në faksimil përcaktohen me vendim të Këshillit Drejtues të Odës.

Neni 23

Dorëzimi i faksimilit

1. Pronar i faksimilit është Oda, dhe si i tillë duhet t'i dorëzohet organit kompetent në të gjitha rastet përshtatshmërisht me dorëzimin e ID kartelës.
2. Të dhënat personale dhe të dhënat tjera relevante që evidentohen në Regjistrin e anëtarësisë së Odës, në Regjistrin e licencimit dhe rilicencimit, dokumentin e Licencës së punës dhe në faksimil, do të bazohen në dokumentin e lëshuar nga organi përkatës shëndetësor arsimor dhe nga organi i gjendjes civile, i cili nuk do të jetë më i vjetër se 6 (gjashtë) muaj, apo letërnjoftimi me afat valid.
3. Në rast të dëmtimit apo humbjes së faksimilit nga anëtari i Odës, i njëjti është i obliguar që në aftë sa më të shkurtër kohor ta njoftojë Odën dhe sipas mundësisë ta dorëzojë kërkesën (formularin) për faksimilin e dytë, bashkë me publikimin e humbjes së faksimilit në ndonjërin nga gazetatat ditore.
4. Në rast mos përmbushjeve të detyrimeve nga ky nen, shërbimi profesional inicion procedurën pranë Këshillit Etik për mos përmbajtje të detyrimeve nga anëtari.

Neni 24

Zbatimi i masave disiplinore të shqiptuara nga organet e mbikëqyrjes etike dhe profesionale

1. Shërbimi Profesional është përgjegjës për ekzekutimin e masave disiplinore përkitazi me revokimin e përkohshëm apo të përhershëm të licencës dhe heqjes nga regjistri i anëtarësisë dhe regjistri i licencave.
2. Shërbimi Profesional do të bëjë ekzekutimin e masës disiplinore sipas urdhrat të organit kompetent që ka shqiptuar masën disiplinore në përputhje me procedurat e parapara për organet etike të OIK
3. Me rastin e ekzekutimit të masës disiplinore sipas vendimit të organit kompetent, Shërbimi Profesional do të njoftojnë Këshillin Etik për ekzekutimin e masës së tillë, në mënyrë që të bëhet evidentimi i ekzekutimit të masës disiplinore në regjistrin e veçantë për masat e shqiptuara disiplinore.

Neni 25

Taksat administrative

1. Taksa administrative për licencim dhe rilicencim caktohet me rregullore për caktimin e lartësisë së taksave administrative, e miratuar nga Kuvendi.
 2. Taksa administrative për licencim dhe rilicencim caktohet për periudhën 5 vjeçare.
- KAPITULLI VII –

KAPITULLI VII
DISPOZITAT KALIMTARE DHE PËRFUNDIMTARE

Neni 26

Hyrja në fuqi

1. Kjo rregullore hyn në fuqi 15 (pesëmbëdhjetë) ditë pas miratimit të saj nga Kuvendi i Odës
2. Çështjet nga fushë veprimtaria materiale dhe procedurale e komisionit për licencimin dhe rilicencimin e logopedëve të cilat nuk janë të përcaktuara me këtë rregullore zgjedhën përshtatshmërisht me rregulloren e përgjithshme për licencimin dhe rilicencimin e profileve të OIK apo mund të procedohen në KD, deri në plotësim-ndryshimin e kësaj rregullore
3. Në rast paqartësi, Interpretimi përfundimtar i saj bëhet nga Këshilli Drejtues i Odës.
4. Kjo rregullore publikohet në ueb faqen e odës

Prishtinë, 2025